

www.BibleForChildren.org

पैदाइस 3



आदम ना आपरी बायको को नाव हव्वा
राखिस, काहेकि जेतरो मानूस जिन्दो सेत उन
सब को आदि माय वाच भयी।



यहोवा परमेस्वर ना जेतरा जंगली जनावर
बनायो होतो, उन सब मा सरप सब लक
चलाक होतो। ओना आईमाई लक कह्यो, का
खरो मा परमेस्वर ना कह्यो सेस, “तुमी यो
बगीचा को कोनी झाड़ को फर नोको खावनो?”



आईमाई ना सरप लक
कह्यो, “ऐना बगीचा को
झाड़ गीन को फर आमि खाय
सकासेजन; पर जो झाड़
बगीचा को बीच मा से ओको फर को बारे मा परमेस्वर
ना कह्यो सेस का ना ता तुमी ओला खावनो अना ना
ओला छिवने नही ता मर जाहो।”



तब सरप ना बायका
लक कह्यो, "तुमी पिक्को
नही मरोह। बलकि परमेस्वर
खुद जानासे का जेने दिवस
तुमी ओको फर खाहो ओनो दिवस तुमरी डोरा उघड़
जाहेति, अना भलो बुरो को तुमी गियान पायके
परमेस्वर को बरोबर होय जाहो।"




ऐना रिती लक जबा बायका ना चोईस का ओनो
झाड़ को फर खावन को साठी साजरो, अना
चोवन मा मनभाउ, अना बुद्धि देवन साठी
चाव्हन काबिल भी सेत; तबा ओना ओमा लक
तोड़के खायो, अना आपरो नौरा ला भी देइस,
अना ओना भी खाईस।



तब उन दुही की डोरा उघड़ गईन, अना उनला
अहसास होयो कि वय बिन कपरा को सेत,
एकोलाय उनना अँजीर को पान जोड़ जोड़के
लंगोट बनाय लेईन।





तबा यहोवा परमेस्वर
ना पुकार के आदम लक पुछिस, “तु कहान
सेस?” ओना कह्यो, “मि तोरो आवाज बारी मा आयक के डर गयो,
काहेकि मि बिन कपरा को होतो; एकोलाय लुक गयो।”





ओना कह्यो, “कोन ना तोला सांगीस का तु बिन कपरा को सेस? जेने झाड़ को फर खावन ला मीना तोला नही कह्यो होतो, का तु ना ओको फर खाईसेस?”



आदम ना कह्यो, “जोना बायका ला तु ना मोरो संग रव्हन ला देईसेस ओनाच उ झाड़ को फर मोला देईसेस, अना मीना खायो।” तबा यहोवा परमेस्वर ना बायका लक कह्यो, “तू ना यो काजक करीसेस?” बायका ना कह्यो, “सरप ना मोला बहकाय देइस, तबा मीना खायो।”





एकोलाय यहोवा परमेस्वर ना उनला अदन को बगीचा मा लक हेड देयो का उ भुई पर खेती करेत, जोनमा लक उ बनायो गयो होतो।




एकोलाय आदम ला ओना हेड़ देयो अना जिंदगी
को झाड़ को रास्ता को पहरा देवन साथी अदन
को बगीचा को दिन उगती को कना
सरगदूत ला, अना चारी कना घूमनवालो
धगाड़ जसो तरवार ला भी ठयराय देइस।




जब आदम आपरी बायको हव्वा को कठा गयो तब वा पोट लक होयके कैन ला जलम देइस अना कह्यो, “मीना यहोवा को मदद लक एक मरद ला जलम देईसेउ।” मंग ओना ओको भाउ हाबिल ला भी जलम दियो। हाबिल मेढा अना सेरी हुन को करप चरानवालो सेरकी बन गयो, अना कैन भुई पर खेती करनवालो किसान बन गयो।



काही दिवस को मंघा कैन यहोवा परमेस्वर ला चढावन साठी भुई की उपज को फसल लक काही भेट ला आनीस, अना हाबिल भी आपरो मेढा अना सेरी को करप लक काही एक पहेलो पाठी भेट चढावन लाई आनीस अना ओकी चरबी ला भेट चघायो, तबा यहोवा ना हाबिल अना ओको भेट ला ता अपनाय लियो, पर कैन अना ओको भेट ला नही अपनायो। तबा कैन लगत गुस्सा भयो, अना ओको टोंड मा उदासी छाय गयी।



तब कैन ना आपरो हाबिल लक काही कव्ह दियो जबा वय मैदान मा
होतीन, तबा कैन ना आपरो भाउ हाबिल पर चघके ओला घात करयो।



तब यहोवा ना कैन लक पुछिस, “तोरो भाऊ हाबिल किता से?” ओना कह्यो, “मालुम नही; काजक मि आपरो भाउ को रखवालो सेऊ?” तब कैन यहोवा परमेस्वर को पुढा लक हिट गयो, अना नोद नाव को देस मा जोन अदन बगीचा को दिन उगती कना से, रव्हन लगयो।



आदम आपरी बायको को कठा मंग गयो, अना ओना एक लेकरा ला
जलम देइस अना ओको नाव यो कव्ह के सेत राखिस। “परमेस्वर ना
मोरो साथी हाबिल को बदला जेला कैन ना मार डाकिस,
एक अखिन खानदान दे देइसेस।”



सेत को जनम को मंघा आदम आठ सौ बरस जिंदो रहयो, अना ओको अखिन भी बेटा बेटी गीन पैदा भयीन। ऐना प्रकार आदम परो तरीका लक नौ सौ तीस बरस को भयो एको मंघा उ मर गयो।



परमेस्वर ना देखयो का धरती पर मानूस को दुराचार बढ़
गयो से, अना ओको मन को सबच बिचार हमेसा
बुराई को लाई होसेत।



परमेस्वर ना कहिसेस, “मी मानूस ला धरती पर लक मिटाय देहू, जेला मीना बनायी होतो। मि मानूस गीन ला, जनावर गीनला, रेंगनवारा कीट अना बादर को पक्सीगीन ला नास करुंह, काहेका मोला यो गोस्टी को दुख से का मीना उनला बनायी सेऊ।”



पर नूह पर परमेस्वर को किरपा को नजर
होती। नूह लक तीन लेकरा पैदा भयीन;सेम,
हाम, अना याफत।



काहेका परमेस्वर ना संसार लक एतरो माया
राखियो, का वोना आपरो चहतो एकच टूरा
ला दे देइसा। एकोलाय जोन कोनी वोको पर
भरोसा राखेत, उ नास नही होहेत पर
अमर जीवन पाहेत।



रोमियो 3:23 हरेक मानूस ना पाप करयो सेत। अना परमेस्वर कन लक दियो तेज बचाव लक लगत दुहर सेत।

रोमियो 6:23 काहेका पाप को बनी तो मरनो से, पर परमेस्वर को बरदान आमरो पिरभू यीसु मसीह मा अमर जीवन सेत।

इब्रानियो 9:27 जसो मानूस को लाय एक बार मरनो, अना एको मघा उनको नियाव होवनो लेखा सेत।

इफिसियो 2:8,9 परमेस्वर को दया कन लक आपरो भरोसा को काजी तुमरो सूटकारा भयीसे। योयो तुमला तुमरी कन लक नही मिलीसे, पर यो ता परमेस्वर को दियो हुयो दान से। अखिन नाता करम लक असो ना होय का कोनी गरब करयेत।



रोमियो 10:9,10 यदि तुमी असो स्विकार करा सेव, का यीसु च पिरभू सेत। अना बिस्वास करो का परमेस्वर ना वोला मरयो हुयो लक जित्तो करयो सेत, तो तुम्हि बच जाहो। काहे का मन मा भरोसा राखन लक मानूस नेक बन जासे अखिन परमेस्वर लक सही संबंध भई जासे। अना स्वीकारनो लक हमीला बचायो जावा सेत। मजे आमरो सूटकारा होवा सेत।

योहन 3:16,17 काहेका परमेस्वर ना संसार लक एतरो माया राखियो, का वोना आपरो चहतो एकच टूरा ला दे देइस। एकोलाय जोन कोनी वोको पर भरोसा राखेत, उ नास नही होहेत पर अमर जीवन पाहेत। परमेस्वर ना आपरो टूरा ला दन्द देवन ला नही, पर संसार ला सूटकारा देवन लाय धाड़ीसेस।

1 योहन 5:11-13 अना ओकी गवाही यो से का परमेस्वर ना आमला अमर जिंदगी देईसेस, यो जिंदगी ओको टूरा कन लक मिलयो से। जोको जवर टूरा से, ओको जवर जिंदगी से, अना जेनको जवर परमेस्वर को टूरा नहाती, ओको जवर जिंदगी भी नहाति। परमेस्वर को टूरा मा भरोसा राखन वालो, तुमला यो गोस्टी मी एकोलाय लिख रही सेऊ जेनको लक तुमी यो जान लेव का अमर जिंदगी तुमरो जवर से।



पैदाइस 3 – 6

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: M. Maillot, Tammy S.

Powari Bible (pwr) © The Word for the World International
and Powari Madhya Pradesh, 2025.

<https://www.bible.com/bible/3714/MAT.1.PSP25>

©2026 Bible for Children, Inc.

www.M1914.org

www.bibleforchildren.org

